

A Tx'an Yet Is Cab

Carta San Pablo

BAY EB AJ TESALÓNICA

Is yichbanil carta Pablo

1 ¹Ajun Silvano yetok Timoteo wetok ayin Pablo in ti', cax chi waontok jun carta ti' ayex, ex creyente aj Tesalónica. Yet exxa co Mam Dios, yet exxa c'apax Cham Jajawil Jesucristo. ²Yak'okabc'al co Mam Dios, yetok Cham Jajawil Jesucristo is watx'c'ulal ayex bay tu'. Yak'okab c'apax is junc'ulal ayex.

Yailal ok cha' eb yob is beybal yet ok jay Cristo

³Ex wux'tak, ex wanab, yowalilc'alta' chi jal yuj diosal bay Dios e yuj. Moj jalon yuj diosal tu' e yuj, yujtol junjun c'u che yac'al oc Dios yin e c'ul. Yetok c'apaxok, yelxac'al lanan e came'ulnelen e ba. ⁴Ayon jun chex ec' jal watx'il xol eb creyente bay junjun yiglesia Dios, yujtol xiwil tzet chi alay oc e yiban, xiwil yailal lanan e yiloni; palta caw wal tec'an che yut e yaon oc e c'ul yin Dios, cax lanan e yak'on techajok. ⁵Cayton tu' chi yun txecloj elok, tol tojolc'al chon yut beyc'ulnen Dios. Chi yaltek e yuj tol e moj e yoc yul k'ab Dios, Cham lanan e yaben yail yuj tu'.

⁶A eb chex etnen tinani', a Dios ok aon oc yailal eb. Bayc'al ijan ton chi yut Dios axca tu'. ⁷Lanan ton e yaben yail jetok, palta ok on yiel Dios xol yailal tu' yet ok jay Cham Jajawil Jesús. Ok tit Cham bay satcan yetok eb yángel xiwil is yipalil. Ok ayol Cham xol jun k'ak' chi chaw xak. ⁸A yet tu' ok yaoc yailal eb maj ojtaknen el Dios, c'al eb maj iken k'anejal yet colbanilej aycan yuj Cham Jajawil Jesús. ⁹Ok tokcan eb bay c'aybanilal yin tojbalk'inal. Ok ilay el eb c'atan Cham Jajawil tu', yet watx' c'amxa oxlajon bak'in ok yil eb is watx'ilal Cham, c'al is yipalil. ¹⁰A yet jun c'ual yet ok jay Cham Jajawil tu', caw wal miman yelapnok Cham yul co sat ayon yet onxa Cham ti', ok ji can Cham mac on creyente onxa ti'. Ay e yalon e yet yin jun tu' yujtol max e yaoc yin e c'ul jun abix ec' albilcan ayex juj.

¹¹Yuj ton jun tu' xan chon txajlic'al e yuj. Chi co k'anon bay co Diosal e yuj, yet watx', watx'okabc'al ex yul sat, yujtol a' awtenej ex oc yetok. Chi co k'anon c'apaxok yet watx' chi yak' yipalil ayex, yet watx' che beybalnej masanil tzet watx' axca che yochej, c'al yin e mulnajil che yun bay, yujtol che yaoc yin e c'ul. ¹²Ta caytu' che beybalnej, ok al-lay watx' k'anej yin Cham Jajawil Jesucristo e yuj, cax ok ex yalon c'apax Cristo watx'il. Caytu' ok ex eloc axca tu', yujtol a co Diosal, c'al Cham Jajawil Jesucristo ok tx'ox watx'c'ulal ayex.

Is txeclobal aj jun yajaw caw yob

2 ¹A tinani xin, ex wux'tak, ex wanab, ok waltok e yabej yuj is jayubal Cham Jajawil Jesucristo, c'al yuj co wajbanilal oc yetok. Chin tewitok ayex tol ²manchak somchaj el e nabal, ta ay eb chi alon ayex, tol jaynakxa is c'ual Cham Jajawil. Caxc'al chi yal eb tol a Yespíritu Dios max alon bay eb, caxc'al yul yet eb tx'oklil chi yalon eb, manchak ex oc il bay chi yal eb. Caxc'al chi yal eb tol max apni co carta bay eb yuj jalon jun ti', manchak e cha e yabej. ³Manchak e yak' e ba yilay aytek e sat yuj junok mactxel, yujtol a yet manto jay jun c'ual tu', ay jun tiempoal xiwil mac ok meltzoy oc ajc'ulal yin Dios, cax ok tx'oxk'abnen aj ba nak yajaw caw wal yob tol t'inan ok alaycantok bay yailal. ⁴Ok yak'lej nak owal yetok Dios. Ok tit yowal yin masanil tzet chi al-lay oc diosal bay chi yal ba anima. Ok yiaj can ba yiban juntzan tu'. Toltax ok octok chotan nak yul templo Dios, cax ok yalon oc ba diosal. ⁵Naektek tol a yet ayin ec' e yetok, max walcan juntzan ti' e yabej. ⁶E yojtak tzet c'amto chi chaon jay nak yajaw yob tu', xan c'am chi txecloj aj yet manto tiempoalok. ⁷Palta lananxa mulnaj yobtakil yin ewantakil tinani', masantac'al ok ilay el mac chi tenon oc wanaj tx'oxk'abnen aj ba tu'. ⁸Catatu bian, ok tx'oxk'abnen aj ba nak yajaw yob tu'. Palta toc'al ok xulay cam yuj Cham Jajawil Jesús. A tzekekial yili Cham Jajawil yet ok jay tu', a' ok ak'on c'ayil jun nak tu'. ⁹A yet ok tx'oxk'abnen aj ba jun winak yajawil yobtakil tu', ok oc Satanás yetok. Ok yak' yipal nak tu'. Yuj tu' xan ay juntzan milagro c'al juntzanxa tzet ok el tx'oxon yuj yetnen anima. ¹⁰Xiwil tzet yobtak ok el yuneni, yuj yion aytek sat eb ok c'aycan elok. Ok c'aycan el eb, yujtol maj yochej eb max yaoc c'ul yin jun cuybanilej caw wal yel, yet watx' chi colchaj eb. ¹¹Yuj tu xin, ok yak' Dios yilay aytek sat eb yuj yajnabalil nak man yelok chi yala', cax ok yaon oc eb lek'tial yin is c'ul. ¹²Yuj tu', masanil eb mac maj yal c'ul max yaoc c'ul yin jun cuybanilej caw wal yel, ok alaycantok eb bay yailal, yujtol max yak' tzalojbok eb c'ul yin yobtakil.

Sic'bil onxa el yuj Dios

¹³Ex wux'tak, ex wanab, camc'ulnebil ex yuj Cham Jajawil. Yowalil chi jal yuj diosalil bay Dios e yuj, yujtol payxatax sic'bil ex el yuj Dios jetok, yet watx' chex colchaj el yuj Yespíritu. A Yespíritu tu' chex aon oc yetok Dios. Yuj

tu' xan chex colchaj jetok, yuj c'apax che yaoc jun cuybanilej caw wal yel yin e c'ul. ¹⁴A k'anejal yet colbanilej ec' albil ayex juj, a' max yak'balnej Dios ex yawten oc yetok, yet watx' ay e yalon e yet yin is tzekekial Jesucristo jetok.

¹⁵Yuj tu xin, ex wux'tak, ex wanab, caw wal tec'an che yut e ba. Manchak e bek c'aytok juntzan cuybanilej ec' jalnak ayex, c'al juntzan albiltok yul carta juj. ¹⁶A Cham Jajawil Jesucristo, yetok co Mam Dios, caw wal ay camc'ulal eb jin. A is watx'c'ulal chi ak'on mimanil co c'ul yin tojbalk'inal, cax chi yak'on c'apax jaon oc is watx'ilal yipok co c'ul. ¹⁷Yak'okab Cham e tzalojc'ulal, c'al e tec'anil, yet watx' a masanil tzet che yala', c'al tzet che yunej, watx'okabc'al yul sat Cham.

Yochwan Pablo chi ak'lay binaj yin txaj

3 ¹A tinani' ex wux'tak, ex wanab, caw wal chex txajli juj, yet watx' yinokab ayman chi toj is k'anej Cham Jajawil xol anima masanil, cax chi chaon eb yin masanil is c'ul, axca max e yut e chaon ayex ti'. ²Chex txajli c'apaxok, yet watx' c'amokab tzet chon utlay yuj eb yob is nabal, yujtol man masanilok anima chi yaoc yin c'ul. ³Palta chic'al yun bay chi yal Cham Jajawil. A Cham chi ak'on e tec'anil. Chex colon c'apax el bay yobtakil. ⁴Chi jaoc Cham Jajawil yipok co c'ul tol lanan e yiken e beybalnen juntzan chekbanil max jal ayex, cax ok e yikenc'al masanil tiempo. ⁵Yak'okab Cham Jajawil nachaj el camc'ulal Dios e yuj, yet watx' caw wal tec'an che yut e ba, axca Cristo.

Yowalil chon mulnaji

⁶Ex wux'tak, ex wanab, yuj chekbanil Cham Jajawil Jesucristo, xan chi jaltok juntzanxa chekbanil ti' ayex. Ta e xol tu' ay junok creyente c'am chi mulnaji, ta c'am chi beybalnej juntzan cuybanilej max ec' jalcan ayex, manchak e junanej e ba yetok. ⁷E yojtakxa, tol moj che beybalnej co beybal, tol man isajok ec' jutnak co ba e xol. ⁸E yojtak, c'am bay toc'al max co k'an low co ba ayex. A ti jet, max on mulnaj c'ualil c'al ak'balil. Caw wal max jak' jip co mulnaji, yujtol maj yal co c'ul max jak' co ba e cargonej yuj co gasto. ⁹Caxc'al ay jalon jet co k'anon co gasto ayex, palta max on mulnaj yetok co k'ab. Cayton tu' max jut co tx'oxoncan el jun watx' beybalej tu' ayex, yet watx' che beybalnej c'apaxok. ¹⁰Yujtol a yet ayon ec' e xol, max jal jun chekbanil ayex, jun chi alon axca ti': Ta ay mac c'am chi yal c'ul chi mulnaji, manchak low c'apaxok, xi. ¹¹Chi jaltok juntzan ti' ayex, yujtol chi jab k'umal, tol ay ex ab c'am chi yal e c'ul chex mulnaji. Toc'al ab comon chex toj xol tzet man e yetok. ¹²A ayex mac ex txel caytu' che yut e ba, a tu' chi jaltok juntzan ti', yujtol max yal Cham Jajawil Jesucristo, xan chi cam jalontok ayex, caw chex mulnaj yin tzalojc'ulal, yet watx', watx'c'al chi ec' tiempo e yuj.

¹³Ex wux'tak, ex wanab, manchak ispay aj e yunen watx'il. ¹⁴Ta ay mac c'am chi iken tzet chi jaltok yul jun co carta ti', chi cam e yiloni mactxel,

yet watx' c'am chex ec' yetok, yuj yelbalok is q'uixwil. ¹⁵Palta c'am chi je' tol ok e yajc'ulnej e ba yetok eb, palta alek yab eb, yujtol e yuxtak eb, e yanab eb.

Yak'okab Cham Jajawil watx'c'ulal bay eb

¹⁶Yak'okabc'al Cham Jajawil, Cham ak'om junc'ulal, is junc'ulal ayex yin tzanc'al tzet chex oni. Ocokabc'al Cham e yetok e masanil bay tu'.

¹⁷Ayin caw Pablo in ti' chin tz'ibejtok in bi ti', yuj txecloj elok tol yel wet ton jun carta ti'. Cac'al ti' chi wut in tz'ibentok in bi yin junjun in carta.

¹⁸Yak'okabc'al Cham Jajawil Jesucristo is watx'c'ulal ayex e masanil bay tu'.